



Tshikuhashitshemukunau


Tipelimitishun

Se gouverner soi-même

Tshikukuetshitshemukunau

TABLE DES MATIÈRES

| | |
|--|----|
| KA ATSHITASHUNISHTETSH 1 UAUHTAKANU | 6 |
| MISHUE E APISHTAKANITSH | 6 |
| KA ATSHITASHUNISHTETSH 2 PEKUAKAMIULNUATSH UTIPELITAMUNUAU | 9 |
| KA ATSHITASHUNISHTETSH 3 TSHE ISH NASHEKANITSH | 10 |
| KA ATSHITASHUNISHTETSH 4 UELUTISHIUNA KIE ASHPITSHISHAMUNA TSHE NASHAKAU PEKUAKAMIULNUATSH | 11 |
| UELUTISHIUNA..... | 11 |
| ASHPITSHISHAMUNA | 11 |
| KA ATSHITASHUNISHTETSH 5 TSHITASSINU | 13 |
| KA ATSHITASHUNISHTETSH 6 NELUEUN | 14 |
| KA ATSHITASHUNISHTETSH 7 PEKUAKAMI-TSHISHE-UTSHIMAU UTIPELITAMUN EKUT NITE TSHE MASHINASHUTAU | 15 |
| KA ATSHITASHUNISHTETSH 8 UELUTISHIUN KA NAKATAMAKUIK | 16 |
| KA ATSHITASHUNISHTETSH 9 TSHISHE-UTSHIMAU ATUSSEUN | 17 |
| PEKUAKAMIU TSHISHE-UTSHIMAU | 17 |
| TAKUHIMATSHEUN TSHISHE-UTSHIMAU TIPELITAMUN..... | 17 |
| KA TUTAKANIKAU TIPELITAMUN | 18 |
| KA UEUESHTAKANITSH PEKUAKAMI-ILNU-TSHISHE-UTSHIMAU | 18 |
| KA ATSHITASHUNISHTETSH 10 E UTSHIMAKANUATSH | 20 |
| KA ATSHITASHUNISHTETSH 11 UTSHIMAU-AIMINANU..... | 21 |
| KA ATSHITASHUNISHTETSH 12 ATUSSEUN | 22 |
| PEKUAKAMIU-TSHISHE-UTSHIMAU ATUSSEUN | 22 |
| KATAKUHIMATSHEA UTATUSSEUNUAU | 22 |
| PEKUAKAMIULNUATSH UTATUSSEUNUAU | 23 |
| PEKUAKAMIULNU UTATUSSEUN | 23 |
| KA ATSHITASHUNISHTETSH 13 TIPELITAMUNA MAK UANISSE E AITUNANUATSH..... | 24 |
| UAUHTAKANU..... | 24 |
| PEKUAKAMIULNUATSH UTIPELITAMUNUAU MAHK MAMU E UANISSE AITUNANUATSH | 24 |
| PEKUAKAMIULNU UTIPELITAMUNUAU | 24 |
| KA ATSHITASHUNISHTETSH 14 MASTEL TSHE ITASHTETSH..... | 26 |
| MASHINATIHUTISHINANU..... | 26 |
| TSHE PITUTSHEPALITSH | 26 |
| TSHE EISH PAMIPALITAKANITSH | 26 |
| KAU TSHITAPATAKANITSH..... | 26 |
| ASHKASHKU UTINEKANITSH TSHETSHI ISHPALITSH | 27 |



« *Miam tshitanashkutapaminuatsh ka apashtatau kukushanahtik^u ka takuhuakau utilu, mamu kuishk takuhitshetau* »

Tshitanashkutapanaminuatsh mishta-ueshkatzh pamishkapanitsh shakahikanihtsh mahk shipihtsh, kapatapanitsh, uapatamupanitsh utshilu mak nitshishkueapanitsh kutakatsh ilnuatsh. Mashue tshitassinahtsh nehlukateu, kapatakana, shakahikana, shipia, utshua. Kie pimishinitsh nehkana tshitanishkutapanaminuatsh. Ekuau nelu tshe tshisselitikau tshitaussiminuatsh kaishpetelitakuatsh kanakatamakuik. Kie tshi nametauatsh ishpishalitsh assi. Eshku nukuanilu nite ka tatau mahk nite ka kutuetau. Uapatakanilu mishue nelu ka ishpitelitikau Tshitassiu mahk kassinu ilniun. Ekuau nite Tshitassinahtsh ka uapatalamahikuik uelutishiuna, ishpitelitamun, uauitishitun mahk matunueun. Uapataliuetau eishilniuik nite Tshitassinahtsh. Takuan tshetshi iakua tutamuk kie tshishpeuatamuk. Uihtamuatauatsh kassinu auenitshenatsh tshetshi ishpitelitikau tshitilnu-aitunu kie tutetau tshetshi aishkatsh Pekuakamiulnuatsh nashakau kuessipan kie uiluau.

Ekuau nite kie tshilanu Pekuakamiulnuatsh, Tshitassinahtsh tshutuhtananu. Tshishe Manitu kamilatuk assilu, tshi ueueshtau tshetshi taik nite tshetshi uhtsh pakassiuik mahk milu-ilniuik. Mishue nite Tshitassinatsh takuan ilniun. Ekute nite natuapamatamuk shutshishiun, pakushelitamun mahk miluelimun.

Tshilanu Pekuakamiulnuatsh tshiuhtenanu e tipelimitishuik Tshitassinahtsh. Takuan nite eishilniuik, eish takuhimatsheik mak eish pamipalitaik tshipakassunu. Nuhtshimahtsh etshi tanuatsh ekut nite uhtsh ish-ashpatashamunantuatsh tshetshi pinamatishunantuatsh kie tipelimitishunantuatsh. Apu uhtsh nita pashtanatishuik kie ne Tshitassiu apu uhtsh nita pashtanamuk.

Tshilanu Pekuakamiulnuatsh tshuelutishinanu, tshitapashtananu ilnu-aimun mahk ilnu-aitun uhtsh Tshitassinahtsh. Eishi ilniuik tshitshisselitenanu kassinu ilnu-aitun. Ilnuatsh tshisselitamuatsh eishi ilniutau kie tshisselitamuatsh eishi natuhutau. Nashemuatau ka uapatalamahikuik tshisselitamuna. Ishpitelitetau tshe ishpish ilniuik tshetshi taship ilniuimikatsh kie shutishimakatsh. Tshitshisselitenanu ushkuishtetau nehlueun tshetshi kanuelitamuk kie taship ashinehikuik. Shash mishta-peshunakun tshe unitaik tshitaimunu. Ashu pashtinetau nehlueun kie nehlue-aimihatauatsh tshutauassiminuatsh tshetshi uiluau kuessipan ashu-pashtinakau.

Tshilanu Pekuakamiulnuatsh mamu tshitananu ashitsh kutakatsh Ilnuatsh ihtsh ilnussihtsh ka tatau. Kie ekute nite uetshipalitsh tshitipatshimunu mak eishilniuik e uapatamuk mishue e tshishkaneshetau Pekuakamiulnuatsh. Ekuau ne uetsh ishinakushik kashikatsh, ishinakuatsh tshitilnu-aitunu, tshinehlu-aimunu mahk tshielutishiunu. Tshitanashkutapanaminuatsh tapuetamupanitsh tshetshi mamu natuhutau ashitsh ihtsh ilnuatsh Tshitassinahtsh kie eshku ekuau ne e aihtiku kashikatsh. Nashetau ka eishi nakatamakuik, matunueun mahk milu-uitsheutun. Mamitunelimatautsh aishkatsh tshitaussiminuatsh tan tshe eishi nakatamuekuatsh tshielutishiunu. Kie uiluau takunilu tshetshi

nashakau tshitilnu-aitunu, tshe nehluetau mahk tshe nishtunakau ishpish uelutishimakatsh Tshitassiu.

Tshimushuminuatsh, kuhkuminuatsh ishpitelimatauatsh, shuelimatauatsh uitishatauatsh uesh uiluau kanauelitamuatsh tshisselitamuna kie unishtunamuau. Takunilu utapunuau mishue tshe takuhimatshetau. Nitahtamuatau utshishkutamatshheunuau.

Tshi alimuhunanu ueshkatsh muhk mak uil anutshish ashinetau katshi passetshisseshakamuk. Nikan pimuhtetau. Tshikunuelitenanu tipatshimun, ilnu-tipatshimun.

Tshishe Manitu nishkumatau katshi milatuk kassinu assi kie ilniun.

TSHILANU PEKUAKAMIULNUATSH TSHIUIHTENANU :

- ✓ E taik nite Tshitassinahtsh kie uehtshik mahk nite uhtsh pakassununuatsh;
- ✓ Ushkuishtamuk tshetshi nehlueik tshetshi aishkatsh taship apishtaik mak tshe uelutishimimakatsh kie ilniuimakatsh;
- ✓ E tapuetamuk tshe atusseshtamuk tshieuueshtaunu mahk tshitipelitamunatshuapinu-ilnu-tshisheu-utshimaunu;
- ✓ Tapuetatishutau tapan eishilniuk.

KA ATSHITASHUNISHTETSH 1

UAUIHTAKANU

Uueeliu kie eieshkupu

MISHUE E APISHTAKANITS

1. Ne ushkatzh aimun e itashtetsh nite Tipelimitishun mashinaikanichtsh eukun ne e apitits e ashu uihtakanitsh tshetshi milu-nashtutakuatsh.
2. Ne eka ka-uihtakanitsh aimuna ute ka atshitashunishtetsh 1 takun tatapishkuatsh tshi nashtutakuatsh.
3. Nihi ish nishtutakuatsh aimuna eukun ute tshe apishitakanitsh ute Tipelimitishun mashinakanichtsh.

Ka Tutekau Tipelitemun

Pekuakami-tshishe-utshimau Ka Tutakau Tipelitamuna.

Eish ilniunananuatsh

Pekuakamiulnuatsh utipelitamunuau ekut nite uetshipalitsh kie ekut nite nakala ka-utsh tshisselitakanilitsh utipelitamunuau.

Pakassun uauitishitun

Pakassun uauitishitun uihtakanu kassinu Pekuakamiulnuatsh tshetshi uitishakanitau, tshetshi etatu miluelimunananuatsh mahk tshetshi tatau Pekuakamiulnuatsh tshe mashituepalitakanitsh pakassun.

Assihtsh ka ilniiumakatsh

Mishta-apatin e tshitapatakanitsh eish ishiliniumakatsh nite assihtsh mak nite tshe uashkamatsh assi kie taship e aiatshimakatsh (miam ne : shakahikan, minashkuatsh).

Ilnu-aitun

Ueshkatsh ka aitunananuatsh mak kashikatsh e aitunananuatsh ashu kashtahikanu ilnu-aitun, uelutishiuna mak Pekuakamiulnuatsh ueshkatsh kaishilniutau ekut nite e kashtahikanitsh tshitassiu kie eukun ne ka mishta-ishpitelitakuatsh ka ish kanauelitamatishuik ashitsh Assi. Kie kassinu uihtakanu ka ish ilniunananuatsh ueshkatsh e natuhunanauatsh, e kussanauatsh, e pishtuhuanauatsh, e tshishulakanitshanauatsh mak e maushunanauatsh ekut nite ka uhtsh pakassunauatsh, e matunamatunauatsh kie nihi ka ishpitelitakuatsh ilniu. Eish aimihauatsh, ilnu-aitunananuatsh, mamu-ilniunananuatsh, mak ka mamuhitunauatsh kashtahikanu.

Kanuelitam^u

Ne ish pamipalitsh Tipelitamu (tipelitamu) eish kashtuhukutau Pekuakamiulnuatsh Tshitassiatsh, uihtakanu e apitshitatau tshe pakassutau, tshe natuhutau kie ishinakunilu Pekuakamiulnuatsh utatuseunuau tshe milu-kanauelitakau, tshi tshishpeuatakau kie kuishk tshe aitunananuatsh nite Tshitassinahtsh tshetshi milelimutau aianishkatsh.

Katakuhimatsheta

Pekuakami-tshishe-utshimau uil nasham^u takuhimatsheun-tipelitamu.

Katapelitak

Auen ka uilakanit tshetshi kanuelitak assilu miam ka itashtetsh nite Pekuakamiulnuatsh utipelitamunuau.

Nelueun

Nelueun eukun nelu Pekuakamiulnuatsh utaimunuau.

Pekuakamiulnu(atsh)

Pekuakamiulnuatsh kamashinashitau nite tipelimitishun mashinaikanhtsh;

Pekuakami-Tshishe-utshimau

Pekuakami-Tshishe-utshimau eukun ne tshe takuhimatshet : tshe tutak tipelitamuna mahk ka ueueshtakanitsh.

Tipelitamu

Ne aimun Tipelitamu nite uhtshapalu ka ueueshtakanitsh kie Pekuakamiulnuatsh e tipelitakau unatuhussiuau (tipelitamun).

Ka-ishilniunanuatsh

Pekuakamiulnuatsh ka-ishilniutau mak ka-aititau kie mahk ka-ashu-miluetau utshiluemakanua. Pekuakamiulnuatsh iapits h eukun eish ilniutau miam ueshkatsh kie kashikatsh kie ashits uss tshekuanahi kie mishkutshapalitsh ilniun.

Ashku ka aiminantuash

Ekut nite uehtshipalitsh tipelitamun tshetshi milu-kanuelitakanitsh mahk ashu-miluanuatsh ilnu-aitun, tshisselitamuna tshitanashkutapanminuatsh ka ashu-miluetau, tipatshimun, mashinakan, ashineu-tipatshimunissa mahk atalukana, ueshkatsh ka aitunantuash, katshassamun, kuishk eish pimutanuatsh, tipelitamuna mahk Pekuakamiulnuatsh ish ueueshtatau utatusseunuau.

Tshitassiu

Pekuakamiulnuatsh shash mishta-tshishe-mitash-mitulnue pipuna e tatau utassiuahtsh kie kashikatsh apu nita uhtsh pashitikau mahk apu nita uhtsh utinamuakanitau.

4. Umehi takuhimatsheuna tshe apitshitanikau e ashu uihtakanitsh Tipelimitishun tshe itashtetsh :

- 1) Ne Tipelimitishun tshika ish uihtakanu kuishk tshetshi pamipalitakanitsh mahk tshetshi mashituepalitakanitsh;
- 2) Ne aimun «takuan» ish uihtamatsheu tshika takuan tshetshi tietsh nashekanitsh Tipelitamun-mashinaikan, makie ihtsh itashtetsh, makie uiesh aitunantuash tshetshi aikam pamipalitakanitsh;
- 3) Nehi aimuna nashtutakuan ashushtakanu tshe nashtutakuatsh «apitshitanak», «ashits», «mahk ne», «e tshitapatakanitsh», «miam» nehi aimuna tshe ish nishtutakuatsh muk tshiam e uihtakanitsh tshekuan;
- 4) Tshe itashtetsh makie tshe ashushtetsh eukun nihi tshe apatikua e uihtakanitsh apu tshikatshi apitsh tshetshi kau uihtakanitsh, apu nakahikanitsh makie mishkutshitanitsh eish kashtuhuet makie tshe eish nishtutakuatsh;
- 5) (Apu issishueik e nelueik miam eish mishtikushiishtetsh (masculin-féminin));
- 6) Makie ihtsh ish uihtakanitsh, tshekuan e peikussimakatsh makie e peikussutau ihlem e uihtakanitsh tshekuan e mitshekuau makie e mitshetunantuash; Peikushtetsh makie mihtshetashtetsh. Peikushu mitshen. (La grammaire en nelueun ne concorde pas du singulier et du pluriel en français).

5. Eka miām iš nishtutakautsh, ueshkatsh ka išhilniunānuatsh mahk ueshkatsh ka tipatshimushtamuk, ilnu-aitun eukun ne tshe apitshitakanitsh e milu-uauihukanikau tshe itashtetsh Tipelimitishun mashinaikanihtsh mahk tipelitamuna tshe tutakanikau.
6. Ne ka nelushtetsh mahk ka mishtakushiushtetsh tatapishkuatsh tshika ishpitelitakuan.
7. Eka milu-nishtutakuatsh ne e nelushtetsh kie e mishtikushiushtetsh nishtam ne ka mishtikushiushtetsh tshe utinakanitsh.

**KA ATSHITASHUNISHTETSH 2
PEKUAKAMIULNUATSH UTIPELITAMUNUAU**

Mamuhituatsh/Tshiueteuatsh unatuhussiuahhtsh

8. Pekuakamiulnuatsh mishta-tshishe-mitash-mitulnue pipuna tshi teuatsh. Tapan ish ilniuatsh kie milu-ueshtauatsh miam utilnu-aimunuau nelueun, eish ilniutau, utilnu-aitunuau mahk utassiuau, kie mamupalu.
9. Pekuakamiulnuatsh tshiluematuatsh ashits h k u t a k a t s h I l n u a t s h k i e m a h k m i l u - u i t s h e u t u a t s h a s h i t s h k u t a k a t s h I l n u a t s h p e i k u i t s h k a i s h i l n i u t a u .
10. Tipelimitishun eukunilu uihtak Pekuakamiulnuatsh utipelitamunuau nelu e tshitapatak uelutishiun mahk ashpitshishamuna tshe ish nashakau Pekuakamiulnuatsh nite e tshishpeuatakau utipelitamunuau kie uanasse ilniun kie Tshitassiu.
11. Tipelimitishun eukun nelu Pekuakamiulnuatsh Ushkatsh utipelitamunuau uihtak Pekuakami-Tshishe-utshimau tshitapatak Tshitassiu.
12. Eka miam ish nishtutakuatsh Pekuakamiulnuatsh tipelitamun tshe tutakanitsh, Tipelimitishun mashinaikan, Pekuakamiulnuatsh utipelitamunuau, ilnu-aitun tipelitamuna mahk tipelitamuna tshe uhtshipalikau nite nishtutatun mashinaikan eukun nihi tshe apitshitakanitsh e tshitapatakanitsh mishue Tshitassinahtsh.

**KA ATSHITASHUNISHTETSH 3
TSHE ISH NASHEKANITSH**

Shutsh-uiushu utshisselitamun

13. Tipelimitishun kassiu Pekuakamiulnuatsh kashtuhukuatsh.
14. Pekuakami-tshishe-utshimau takunilu tshe nashakau Tipelimitishun mahk kutak tshishe-utshimau atusseun tshe tshimatatau makie Ilnu tipelitamun.
15. Nite ka itashtetsh ka atshitashunashtetsh 5 kassiu nelu kashtuhukuatsh Pekuakamiulnuatsh.
16. Nite ka itashtetsh ka atshitashunashtetsh 8 kassiu nelu kashtuhukuatsh Pekuakamiulnuatsh.

KA ATSHITASHUNISHTETSH 4
UELUTISHIUNA KIE ASHPITSHISHAMUNA TSHE NASHAKAU PEKUAKAMIULNUATSH

Ilniuheu utshiluemakana

UELUTISHIUNA

17. Pekuakamiulnuatsh ekun nelu tshe nashakau uelutishiuna :

- 1) Ka ashinehikuik ka ishilniuik, ilnu-aitun mahk nelueun, ekut nite kahtshatshapalitsh tshilanu itelitakushik.
- 2) E ishpitelimitishunatuatsh, e ishpitelimakanitsh kutak auen kie e ishpitelitakanitsh uashka kassinu ka ish milutuhk Tshikauinu Assi, utessihtsh, tshipa takuan tshetshi nukuhtaik mishue nite e taihk kie e aithk.
- 3) Uauitishitun mahk matinueun, nite ka aitinatuatsh nutshimihtsh, tshipa tshikanakutakanu mishue eish tshiluematuatuatsh kie mamu ilniunatuatsh.
- 4) Pekuakamiulnuatsh mishta-ishpitelimeuatsh utshiluemakanauau; kie utanashkutapanamuau alu ishpitelimakanatuatsh auassatsh kie tshishelnuatsh kie taship tshetshi nukushutau tshe tshitapatakanitsh e ashu miluanuatsh nelueun mahk tshisselitamuna.
- 5) Tshishushtshitelminu, tshiam ilniun, e passetishakamuk alamahun nite Tshitassinahtsh uhtshapalu ekut nite uhtanamuk shash mishta-tshishe-mitash-mitulnue pipuna eishpish ilniuik kie kassinu tshekuan ka ilniumakatsh ka ishpitelitamuk.

ASHPITSHISHAMUNA

18. Eukun umelu ashpitshishamuna tshe nashakau Pekuakamiulnuatsh:

- 1) Taship tshishpitelitenanu Tshitassiu kie takuan iakua tshetshi tutamuk tshetshi taship tatau Pekuakamiulnuatsh mahk tshetshi mashituepalitatau utilniunuau Pekuakamiulnuatsh.
- 2) Tshimishta-ashinanana nite mihtshet eish tshiluematuik kie tshitatshishkatinanu ka eish ilniuik shash mishta-tshishe-mitash-mitulnue pipuna kie tshimili-uitsheuaatsh kutakatsh ilnuatsh.
- 3) Kuishk tshitaitunanu kie kuishk tshitutuanuatsh kassinu Pekuakamiulnuatsh.
- 4) Tshimishta-natutamuananu tshishelnuatsh utaimunuau, tshimishta-ishpitelitamuananu utshishkutamatsheunuau ka ish uluipalitatau.
- 5) Kuishk tshitutenanu kie kuishk tshitutuanuatsh pahpeik^u auen kie mahk nikana tat e tshiluemitanatuatsh makie kie ne ka nikamatet.
- 6) Tshinishtuapatenanu kie tshinukutananu e ilnu-aititau Pekuakamiulnuatsh kie eish pukutatau kashikatsh atusseun eish nukukau.
- 7) Nikanitsh tshuapatamuanu kashikatsh kie aishkatsh Pekuakamiulnu tshetshi etatu milelimut.
- 8) Nikan tshitashtananu tshe ui kanuelitamuk milu-uitsheutun.
- 9) Tshinashtuapatenanu kie tshinukutananu e ashu-miluanuatsh pakassun kie tshe apatitsh naute tutakanitsh pakassun-atusseun;

- 10) Tshitakuhimatsheunu tshikanakun, kuishk aitunanu, tapuetamun kuishk utinakanu kie mahk Pekuakamiulnuatsh tshe tatau aitunanuatsh.

KA ATSHITASHUNISHTETSH 5
TSHITASSINU

Uanasse ilniunanaatsh

19. Shash mishta-tshishe mitashmitulnue pipuna ka tatau Pekuakamiulnuatsh utassiuahhtsh. Ekut nite telipan utshiluemakanauau kie ekut nite natshishkuepanitsh kutakatsh. Ekut nite uhtshapalitsh e itelitakushik, ilnu-aitun, eish aimahaik, eish ilniunanaatsh, Pekuakami-tshishe-utshimau atusseun mahk Pekuakamiulnuatsh upakassunuau.

Tshitassiu, eukun ne ishpishatsh Mestachibo, luash Pitchita8itchez, uinapek-shipi St-Laurent. Luash nete ishpashau Manauan shipihtsh, Shamushuan-shipi, Mishtashini-shipi, Pelipaukau-shipi. Kie Tshitassiu natautshimakan ishpish tshisselitakau tshishelnuatsh mahk ka ish nanitu tshisselitakanitsh nite Pekuakamiulnuatsh utassiuahhtsh.

20. Tipelitam^u, ilnu-aimun an ekut nite uhtshapalitsh ilnu-utilniun kie uihtakanu ish tipelitakau Pekuakamiulnuatsh ashitsh Utassiuau mishta-tshishe mitashmitulne pipuna ka ishpish tatau mahk uihtam^u e tipelitakau kie e kanauelitikau Pekuakamiulnuatsh Utassiuahhtsh.
21. Tipelitam^u uihtamu utipelitamunuau Pekuakamiulnuatsh eishpatashtamakatsh Utassiuau.
22. Kanuelitam^u, ilnu-aimun ne ekut nite uetshapalitsh e tipelitakau Pekuakamiulnuatsh Utassiuau, kie shitshamakanuatsh Pekuakamiulnuatsh mahk Pekuakami-tshishe-utshimau tshetshi milu-nanakatshitatau Tshitassiu, iakua tutakau mahk ishpitelimatau aueshishatsh, nameshatsh, mishtikuatsh, kassinu tshekuan ka ilniumakatsh tshitassinahtsh.
23. Pekuakami-tshisheu-utshimau takunilu tshe tshishpeuatak kie akua tutak Tshitassiu, ka uashkamatsh assi, ka ilniumakatsh tshekuanahi kie ka ish kanauelitamashit tshetshi milukanauelitak mahk nakatamuatau tshitaussiminuatsh kie tshussiminuatsh.
24. Pekuakamiulnuatsh tshipatschi tutamuatsh tipelitamunilu tshi kashtahikanitsh e ilniunanaatsh nutshimatsh, takuhimatsheun, tshishpeuatakanitsh, milu-kanauelitak, ka uashkamatsh assi, ka ilniumakatsh kassinu tshekuanahi mahk ka ish kanauelitamashit.

**KA ATSHITASHUNISHTETSH 6
NELUEUN**

Neluetau!

25. Nelueun eukun nelu Pekuakamiulnuatsh utaimunuau.
26. Kassinu Pekuakamiulnuatsh utipelitamunuau tshe uluitishinakau takunilu tshetshi nelushtelitsh.
27. Pekuakami-tshishe-utshimau utapahikana atusseuna, uitishiuna, ka uluitishanakanitsh atusseuna, tapuetatamun aimuna kie kutaka mashinaikana ei tapishtakanitsh Pekuakami-tshishe-utshimau makie atusseutshuapa tshi nelushtetsh.
28. Pekuakami-tshishe-utshimau takunilu tshi tutak tipelitamun tshetshi taship ilniumakatanitsh, uauihukanitsh, ashu-miluanuatsh, kie tshishpeuatakanitsh Nelueun.

**KA ATSHITASHUNISHTETSH 7
PEKUAKAMI-TSHISHE-UTSHIMAU UTIPELITAMUN EKUT NITE TSHE MASHINASHUTAU**

Peikutenuatsh mamuhituatsh

29. Pekuakamiulnuatsh takunilu tshi tutakau tipelitamun tshetshi mashinashunuanuatsh tapuetatishunuanuatsh eish uilukuin taship tshi tanuatsh kie taship mashituepalitakanilitsh utilniunuau Pekuakamiulnuatsh.

KA ATSHITASHUNISHTETSH 8
UELUTISHIUN KA NAKATAMAKUIK

Uelutishiun

30. Kassinu ka ish kanauelitikau Pekuakamiulnuatsh, ka takunilitsh Utassiuahrtsh : nekana ka pamishinitau, nite ka mamuhitunantuatsh, aituna, nelueun, ilnu-ilniun, ilnu-aitun, ilnu ka ish pukutat, ilnu tshisselitamuna, nutshimiut natukulin, ka milu-nukutatau kie nutam ka mataupukutanuatsh e metuanuatsh, e mashinatahikanitsh tipatshimuna, metueuna, e nashakau aitun, ueshkatsh ka ish tshisselitakau ekute takuatsh uelutishiun kie tshika tshishpeuatakanu nite Tipelimitishun mashinaikanhtsh.
31. Uelutishiun Pekuakamiulnuatsh kassinu nelu tipelitamuatsh kie apu auen tshi utinamatishit.
32. Pekuakamiulnuatsh tshipatshi tutamuatsh tipelitamuna taship tshetshi mashituepalitakanitsh, tshishpeuatakanitsh mahk iakua tutakanilitsh nelu Pekuakamiulnuatsh umamitunelitamunuau, uelutishiun, utshisselitamunuau mahk umilelimun eitunantuatsh.

**KA ATSHITASHUNISHTETSH 9
TSHISHE-UTSHIMAU ATUSSEUN**

Pekuakamiulnuatsh eish takuhimatishitau

PEKUAKAMIU TSHISHE-UTSHIMAU

33. Pekuakami-Tshishe-Utshimau telu nite Katakuhimatsheta, Ka Tutakau Tipelitamuna tshe atusseshtikau Tipelitamuna tshe atusseshtikau tipelitamuna miam ka mashinatelitsh nite Tipelitamun mashinaikanhtsh mak nite Pekuakamiulnuatsh utipelitamunuau.
34. Pekuakami-Tshishe-Utshimau takunilu tshi uauapatakau Pekuakamiulnuatsh utatusseunuau kie utapitelitamunuau : mililniun, auassatsh eish tshishpeuatakanitau kie utshiluemakanuau, katshishkutamatshanuatsh, ilnu-aitun, tshe tshishpeuatakanitsh kie tshi tanuastash kie tshe apatshishtakanitsh tshitassiu, nelueun, e uashkamatsh assi, e mashinashunantuash, takuhimatishun, ka ueueshtakanitsh kie tshe tshishpeuatakanitsh uelutishiun.

TAKUHIMATSHEUN TSHISHE-UTSHIMAU TIPELITAMUN

35. Pekuakami-Tshishe-utshimau takuhimatsheun tipelitamun uiluau Katakuhimatsheta tutamuatsh tshe eish meshkanatshetau, tshe pamipalitatau tipelitamuna mahk tshitapatamuatsh Pekuakamiulnuatsh atusseuna eish uitishakanitau.
36. Katakuhimatsheta, Ilnu-utshimau teu nite mak kutuasht takuhikanissatsh miam nite eitshishtetsh Pekuakamiulnuatsh e utshimakanuatsh mashinaikanhtsh.
37. Pekuakami-ilnutshimau nikanipu, pimuhtatau Pekuakamiulnuatsh utaimunuau.
38. Katakuhimatsheta pimuhtatauatsh Pekuakamiulnuatsh utaimunuau mak uitsheutunantuash ashitsh kutakatsh ilnuatsh kie tshishe-utshimauatsh.
39. Katakuhimatsheta tshipatshi uishameuatsh Pekuakamiulnuatsh tshetshi uitsheutunantuash ashitsh kutakatsh ilnuatsh mak tshishe-utshimauatsh.
40. Katakuhimatshetau tshipatshi tshimaleuatsh mak mileuatsh atusseuna ka mamuhitutau kassinu ka ishinakanikau tshetshi uauitishiuetau miam nite ish atusseshtakanikau tshishe-utshimau tipelitamuna mak tshetshi uitishatau tshishe-utshimau mak nite kauueeshtashutau, e milelimunuatsh, pakassun makie e mamu ilniunantuash.
41. Katakuhimatsheta takunilu tshi natshishtatau tshe ish pimipalitakanitsh tshetshi milakanitau Ka Tutakau Tipelitamuna kie mahk Pekuakamiulnuatsh tshi eishkushtatau tipelitamuna.
42. Katakuhimatsheta apu tshi anuelimakanitau e nashakau miam e itshishtelitsh nite Tipelitamun mashinaikanhtsh mak eish kashatahikanikau tipelitamuna, e ish uitishakanitau ilnuatsh, shuliau makie uitishieune nite tshe uhtshapalikau tshishe-utshimautahtsh.
43. Katakuhimatsheta takunilu tshetshi nikanashtatau tan eish tshishtatanuatuash mak tan ish aimahakanitau kutakatsh tshishe-utshimauatsh tshetshi kie uiluau ishpitelitikau Tipelimitishun mashinaikanhtsh miam e itashitelitsh.

KA TUTAKANIKAU TIPELITAMUN

44. Ka tutakau tipelitamun uiluau tapuatumuatsh mahk tapuetatishuatsh kie pamipalitauatsh Pekuakamiulnuatsh Utipelitamuau pahpeik^u-pipun tshe ish pitutepalitsh shuliau mahk tshe ish mashtenikanitsh.
45. Ka Tutakau Tipelitamun peikushte (9) itashuatsh katshimilakanitau miam nite ka itashtetsh utshimakanuatsh mashinaikanhtsh.
46. Ka tutakau tipelitamun tshimaleuatsh peik^u tshishelnu, peik^u(1) ka tshishapeut, ka tshishishkueut, peiku (1) Katipelitak kie mahk nish^u (2) Katakuhimatshetau etshi naushunakanitau.
47. Takunilu peik^u (1) utapun Katakuhimatshet tshetshi tat e natshishkatutau Ka Tutakau Tipelitamuna.
48. Pekuakamiulnuatsh uishamakanuatsh e natshishkatutau Ka Tutakau Tipelitamun.
49. Ka Tutakau Tipelitamuna takunilu tshetshi tutakau tipaikana e natshishkatunantuatsh miam Pekuakamilnuatsh ka aitutau ueshkatsh kie tshetshi milatau Pekuakamiulnuatsh tshi pashtinakau utaimunuau e natshishkatunantuatsh.
50. Ka Tutakau Tipelitamuna tshika natshishtauatsh ka mamuhitutau kassinu ka ishinakatekau tshetshi tatau kassinu Pekuakamiulnuatsh.
51. Ka mamuhitutau kassinu ka ishinakatekau teu nite eluetsh peik^u Ka Tutakau Tipelitamuna, apu tshikuatsh tatau Katakuhimatsheta, kie Pekuakamiulnuatsh.
52. Ka Tutakau Tipelitamuna takunilu tshi uilatau auenitshenatsh tshi nanakatshshtatau tshishe-utshimau atusseun kie ishpitetakanitsh kuishk atusseuna tshe ka itashtekau.
53. Ka tshitapatakau kuishk atusseun taship tshipatshi pashtinamuatsh utaimunuau nite Ka Tutakau Tipelitamuna mak uihtakau tan tshipa ish mishkutshitanu mashinaikan tshe eish nashekanitsh.
54. Ka Tutakau Tipelitamuna takunilu tshi natshitatatu kuishk atusseun, mileuatsh Pekuakamiulnuatsh tshetshi atshenatau Katakuhimatsheta, Ka Tutakau Tipelitamun makie peik^u ilnu ka tshimilakanit, ka mishta-patahakau utatusseunuau.

KA UEUESHTAKANITSH PEKUAKAMI-ILNU-TSHISHE-UTSHIMAU

55. Pekuakamiulnuatsh tshipatshi natshishtauatsh tshe ish nashekanitsh, e ueueshtakanitsh tshe ish ashpitashamunuatsh nitetshe kuishk iliun mak e pushupalinamuatsh eish pimuhtanuatsh e ueueshtakanitsh.Tshetshi nishtutatishunamuatsh ashitsh kutakatsh Ilnuatsh makie tshishe-utshimauatsh tshetshi milakanitau tshe ish pamipalitsh kaeueueshtakanitsh makie apashtakanilitsh u ueueshtashunuau.
56. Ka Tutakau Tipelitamuna takunilu tshi uilatau Kananakatshishiuetu, tshe milatau atusseuna tshetshi ishpitelitakanitsh Tipelimitishun mashinaikan kie tshe tshishpeuatakanitsh Pekuakamiulnuatsh utipelitamuau.

57. Kananakatshishietau takunilu u tipelitamunuau, tshipatshi anuelimeuatsh auelu kie tshipatshi shitshimakanu tshetsh ishpitelitak Tipelimitishun mashinaikan tshek eka kuishk nashik miam e itashtetsh Pekuakamiulnuatsh utipelitamunuau.
58. Ka Tutakau Tipelitamuna takunilu tshetshi uluitishinikau tipelitamun tshetshi nashekanitsh tshe ish atusseshtakanitsh atusseun, tipelitamuna, ish pimuhtanuatsh kie tshe uilakanitau nitshenatsh tshe apitau nite Kananakatshishietau kie tshishtin tshe kanauelitakau tapan utatusseunuau.

Tshikukuetshitshemukunau

**KA ATSHITASHUNISHTETSH 10
E UTSHIMAKANUATSH**

Itahitsheu ashitsh utapui

59. Takuan tshetshi mashinatahutishunananuatsh e utshimakanuatsh miam ne tshishik^u ka ish natuelitakanitsh.
60. E utshimakanuatsh, Ilnu-utshimau takunilu tshi mihtshetilitsh ilnuatsh e uitishikut.
61. Pekuakamiulnuatsh takunilu tshe kanauelitikau tipelitamun tshe ish utshimakanuatsh tipelitamun e ui tshi tshimalakanit Pekuakami-Tshishe-Utshimau.
62. Pekuakamiulnuatsh takunilu tshi kanauelitikau mashinaikan tshetshi milakanitau kassiu Pekuakamiulnuatsh tshi mashinatahutishutau.
63. Tipelitamun e utshimakanuatsh takuan tshetshi eieshkushtakanitsh tshe eish pimuhtanuatsh tapuetuakanitau kassiu Pekuakamiulnuatsh ui mashinashutau tshe mashinatahutishunananuatsh tshetshi katshatshipitau nite Katakuhimatshetau mahk Ka Tutakau Tipelitamuna.
64. Tipelitamun e utshimakanuatsh takuan tshetshi eieshkushtakanitsh tshe ish pimuhtanuatsh tshe ui nashtutatishunananuatsh tshe pikunakanitau eka nashtutatishutau Katakuhimatshetau mak Ka Tutakau Tipelitamuna.

**KA ATSHITASHUNISHTETSH 11
UTSHIMAU-AIMINANU**

Utshimau-aiminanu nanishtu-pishimu

65. Katakuhimatsheta takunilu tshi utshimau-aimitau e nipiñilitsh, tekuatshinilitsh, pipunilitsh, shikuaniñilitsh, milushkamilitsh tshetshi kuetshematau Pekuakamiulnuatsh nelu ka ish kashtahukutau kie tshetshi milakanitau tshi aimitau.
66. Katakuhimatsheta takunilu tshetshi tutakau tan tshe ish nashekanitsh e utshimau-aiminanuatsh kie tshe uishamakanitau kassinu Pekuakamiulnuatsh miam nekana tshinashkutapaniminuatsh ka aitutau.

KA ATSHITASHUNISHTETSH 12 ATUSSEUN

Mamu pamishkatau

PEKUAKAMIU-TSHISHE-UTSHIMAU ATUSSEUN

67. Pekuakami-Tshishe-Utshimau utatusseun takunilu:

- 1) Tshi uihtak Pekuakamiulnuatsh e tatau shash mishta-tshishe-mitash-mitulnue pipuna Tshitassinahtsh;
- 2) Tshi tshishpeuatat Pekuakamiulnuatsh, tshi nukutat mak ishpitelitak ilnu-aitun mak nelueun;
- 3) Tshi tutak atusseuna tshetshi nukutat e ashu-pishtanikanitsh, tshishpeuatakanitsh mahk tshi tshishkutamatshanuatsh nelueun;
- 4) Tshi pamipalitat tipelitamun Tshitassinahtsh tshetshi tshishpeuatak kie tshetshi akua tutak;
- 5) Tshitshishpeuata kie iakua tutak uashkama assi;
- 6) Tshi tutak anitsh atusseun tshetshi milakash nikanishtat tshitassinu mak tshi milakash milu-atusseshtak ilnu-aitunilnu;
- 7) Tshi mishta-tshishpeuatat kassinu ilnuatsh, auassatsh, tshishelnuatsh, kanenekatishutau mak tshi milakanitau tshi milu-natautshita;
- 8) Tshi nikanishtat tshetshi tatapishkut Pekuakamiulnuatsh ish pamipilahakanitau;
- 9) Tshi nukushutau Pekuakamiulnuatsh e utshimakanuatsh kie tshetshi tatau e aitunantuash ilnussihtsh;
- 10) Tshi milat kassinu Pekuakamiulnuatsh tshe mashinatahutishalitsh miam itashtelitsh Pekuakamiulnuatsh tipelitamun;
- 11) Tshi milat utapunuau tshishelnuatsh, ka auassiutau mahk Katipelitikau tshi tatau nite Pekuakami-tshishe-utshimau;
- 12) Tshe kuetshimat Pekuakamiulnuatsh tan eish kashtuket atusseuna tshe ish apitishimunanuatsh ka ish mashinatetsh atusseuna;
- 13) Tshi milu-takuhimatshet, tshikanakutat utatusseun kie mahk kuishk tshe atusseshtak.
- 14) Tshi mishituepalitakanit malakash tshi milu-uitsheutunantuash ashits Uitshilnuatsh kie ashitsh kutakatsh ilnuatsh peikuitsh ka ishilniutau.
- 15) Tshi mishituepalitakanit malakash tshi milu-uitsheutunantuash ashits Uitshilnuatsh kie ashitsh tshishe-utshimautsh.

KATAKUHIMATSHTA UTATUSSEUNUAU

68. Pahpeik^u takuhikanissatsh ashitsh ilnu-utshimau umelu utatusseunuau :

- 1) Tshi pimutatutau kassinu Pekuakamiulnuatsh utapitelitamunuau, kie eka auen malelimakanit;
- 2) Tshi mishta-atusseshtakau atusseuna kie tshi utinakau aimunilu ashitsh Katakuhimatshta makie ashitsh Ka Tutakau Tipelitamuna;
- 3) Tshi utinakau atusseuna ka ish milakanitau nite Tipelitamun mashinaikanichtsh kie nite tshe itashtelitsh Pekuakami-tipelitamuna;
- 4) Tshi kuishk aitit e atusset;
- 5) Tshi ishpitelitikau kuishk atusseun ka ish tatshikakutau;
- 6) Tshetshi eka nikanipalitat uil utapitelitamun.

PEKUAKAMIULNUATSH UTATUSSEUNUAU

69. Pekuakamiulnuatsh shash e takunilits h eish ilniutau, kassinu Pekuakamiulnuatsh takunilu tshi nashakau umelu utatusseunuau;

- 1) Tshi nashpits h kanauelitakau kie tshi nashpits h ishpitelitakau utilnu-aitun kie mahk e ash u-miluetau ilnu-aitun mahk Nehlueun;
- 2) Tshetshi pamipalitakanitsh kanauelitamun tshe tshishpeuatakanitsh kie akua tutakanitsh Tshitassiu mahk ka ilniumakatsh assi mahk ish kanauelitamashuik.
- 3) Tshetshi akua tutuatau kassinu Pekuakamiulnuatsh, auassatsh, tshishelnuatsh, kanenekatishutau mahk tshi milakanitau kassinu tshekualu tshetshi miluelimutau;
- 4) Tshi tshishpeuatastu mahk milatau utapunuau tshishelnuatsh, ka auassiutau mahk Katapelitakau.

PEKUAKAMIULNU UTATUSSEUN

70. Pekuakamiulnu takunilu tshi milu-pamipalitat kassinu ilnu-atusseun umelu tshika ishinakunilu utatusseun :

- 1) Tshi ashenet e uapataliuet Pekuakamiu ilniun, kie tshetshi ishpitelitak mak tshi ashenet kie ashaneuatshet ilnu-aitunilu;
- 2) Tshi mishuetapalitat mahk tutak tshetshi milu-uitsheuat Pekuakamiulnuatsh;
- 3) Tshi tshishkutamatishit, aimit mahk ash u-pashtinak Nelueunilu;
- 4) Tshi ash u-pashtinak mak matnuet Pekuakamiulnuatsh utshisselitamunuau tshetshi milelimutau;
- 5) Tshi ishpitelimat ashitsh milu-uitsheuat Pekuakamiulnuatsh;
- 6) Tshishpitelitak kassinu ka ilniuimakatsh assi htsh;
- 7) Tshi apitshitat Tshitassiu kie ish kanauelitamashit ashitsh milu-uauapatak kie ka uashkamatsh assi mahk kassinu ka ilniumakatsh;
- 8) Tshi nukushit e tshishe-utshimau atussanuatsh kie mashinatahutishit e utshimakanuatsh;
- 9) Uauitishat uitshilnim mak mamishamatshelamut e uapatak tshekualu eka kuishk e aitunanauatsh mahk uil eka kuishk e aitutuakanit.

**KA ATSHITASHUNISHTETSH 13
TIPELITAMUNA MAK UANISSE E AITUNANUATSH**

Ui miluelimuihk ishpitelimitishutau

UAUIHTAKANU

71. Pekuakamiulnuat uiepeliatamunuau mashinaikan uihtamuatsh tshishtin tshe ishinakutakanitsh tipelitamuna kie ne uanisse tshe aitunantuatsh nite uihtakanikau muk apu tshi atshunakanikau patush takuatsh tipelitamun tipahikan, mahk tshetshi nishtutakuatsh eka shuk pashitshipalitatau e uanisse aitunantuatsh.
72. Pekuakamiulnuatsh utipelitamunuau mak uanisse e aitunantuatsh eukun nite e uihtakanikau Tipelimitishun mashinaikanihtsh ek^u tshi pamipalitaatsh tshetshi eka auen atshinakanit nite uehtshit, eish uilitishit, eish aimit, eish aiamihanuatsh, ish kanauelitakanitsh, aiamiheun, eish mamitunelitakanitsh utshimau-atusseun, e uihtakanitsh tan eish pamipalitau ilnuatsh, ka massit auen, titapipuneshun, uil eish uapamatishit kie eish ilniut.
73. Aimun 72 namieu an e tshitahamuet tshetshi tutakanikau tipelitamuna, tshishe-utshimau eish uitishiuet makie e aitunantuatsh tshetshi milu-palilitsh utilniunuau Pekuakamulnuatsh makie ne ka ish tshishatshitetsh.
74. Pekuakamiulnu itelitamukue e mitshatipelimakanit makie e ashnenakanilits h utipelitamuna kie mahk uanisse tshetshi aitit miam itashtelitsh nite Tipelimitishun mashinaikanihtsh tshipatshi uihtamueu Kananakatshishietau tshetshi ueshtakanilits ka ish natshishkak.

PEKUAKAMIULNUATSH UTIPELITAMUNUAU MAHK MAMU E UANISSE AITUNANUATSH

75. Pekuakamiulnuatsh utipelitamunuau mamu pamipalitakanilu eish paminitishit mahk ashits h utipelitamuna.
76. Pekuakamiulnuatsh utipelutamunuau mahk uanisse tshe aitunantuatsh eukun umelu tshe itashtelitsh :
 - 1) Tshe tatau mahk apatshitatau Tshitassiu kie iakua tshetshi tutak eish kanauelamashit;
 - 2) Tshe apitshtatau u tapan ilnu-aitunuau;
 - 3) Tshe mashituepalitatau, tshishpeuatakau mahk milu-kanauelitakau ilnu-aitun ka-nakatamakuik, tshisselitamuna kie e milu-nukutatau ilnu-aitunilu;
 - 4) Tshi milu-lehlanuatsh, nipi tshe miluakamatsh, mahk assi tshi uashkamatsh nite ishpatashtkamatsh Tshitassiu;
 - 5) Tshetshi uihtamuakanitau mahk kukuetsimukanitau e ui ish uikutshitatau;
 - 6) Tshetshi mashituepalitakanitsh mahk milu-kanauelitakanilits kie mahk eish pamipalitat utatusseutshuapama, tshishe-utshimau atusseuna, pakassun atusseuna mahk eish ilniunantuatsh;
 - 7) Tshetshi mashituepalitakanitsh mahk milu-kanauelitakanitsh pakassun mahk shutishimakatsh nanaku pakassun;
 - 8) Tshetshi uanasse aitunantuatsh, tshiam ilniunantuatsh, tshetshi eka tshekuan kushtanelitakuatsh tshilanu Pekuakamiulnuatsh ka eish nashtunakuik.

PEKUAKAMIULNU UTIPELITAMUNUAU

**KA ATSHITASHUNISHTETSH 14
MASHTEL TSHE ITASHTETSH**

Natsh mashinatahutishutau

MASHINATIHUTISHINANU

79. Pekuakamiulnuatsh tshika mashinatahutishut eshk eka tapuetakanitsh tipelimitishun mashinaikan.
80. Eish natuelitakanitsh tshe mashinatahutishunatuatsh tshetshi itashutau 35% Pekuakamiulnuatsh ka tapuetuakanitau, ek^u eka itishutau apu tshika uhtsh takuatsh Tipelimitishun.
81. Ashitsh tshe itishutau ka mashinatahutishutau miam ne kaitashtetsh aimun 80, takunilu tshetshi alu mitshetitau neme tshe mashinatahutishunatuatsh Tipelimitishun mashinaikan tshetshi pamipalitakanitsh.

TSHE PITUTSHEPALITSH

82. Tipelimitishun mashinaikan tshe pitutepalitsh tshika utinakanu tietsh tshi tapuetatishutau Katakuhimatsheta.

TSHE EISH PAMIPALITAKANITSH

83. Katshi tapuetakanitsh Tipelimitishun mashinaikan takunilu Katakuhimatsheta tshe mashinatahakau tshe ish pamipalitatau atusseun.
84. Ne uetsh tutakanitsh tshe ish pamipalitakanitsh Tipelimitishun ui kashtahikanu ushkatzh tshe ish pimuhtnuatsh, kassnu Pekuakamiulnuatsh tshi tapuetakau mahk tapuetatishutau eish nukushutau.
85. Takuan ne tshe ish pamipalitakanitsh atusseun tshe atusseshtakanitsh petshikatshish mahk tshipatshi mishkutshitananu ish kanauelitak Pekuakami-tshishe-utshimau.

KAU TSHITAPATAKANITSH

86. Ka Tutakau Tipelitamuna kau tshitapatamuatsh Tipelimitishun mashinaikan:
 - 1) nishu (2) pipuna katshi tapuetakanitsh;
 - 2) patetatsh (5) pipuna katshi tapuetakanitsh;
 - 3) Kutulne (10) pipuna katshi tapuetakanitsh.
87. Ka Tutakau Tipelitamuna tshipatshi taship mishkutshishtau Tipelimitishun mashinaikan, itelitak tshe mishkutshishtetsh.
88. Mishkutshishtakanitsh Tipelimitishun mashinaikan takuan tshetshi tapuetakau Pekuakamiulnuatsh, tshika uishamakanuatsh tshetshi nitu mashinatahutishutau.
89. 88 aimuniss, Ka Tutakau Tipelitamuna tshipashi mishkutshishtauatsh nass eka natauelitakanitsh tshi mashinatahutishunatuatsh muk mahk uil takunilu tshetshi eka mishta-mishkutshishtetsh Tipelimitishun makie eish nishtutakuatsh.

ASHKASHKU UTINEKANITSH TSHETSHI ISHPALITSH

90. Luash tshe pitutepalitanitsh utshimakanuatsh tipelitamun kie ushkatzh tshimalakanitau Pekuakami-tshishe-utshimau kassnu ka ish atussananuatsh kie takuhimatshanuatsh eukun ne tshe kanauelitakanitsh miam tshe ish apititsh ute.
91. Ilnu-tshimau mahk Katakuhimatsheta ka tatau eshk eka pihtutepalitsh Tipelimitishun mashinaikan ekut nitshe tshe takuhimatshetau Pekuakamihtsh patama luash ushkatzh kie uipatsh tshe utshimakanuatsh.
92. Kuntuashtatulnu (60) tshishikua katshi pihtutepalitsh Tipelimitishun mashinaikan Katakuhimatsheta uihleuatsh Ka Tutakau Tipelitamuna, umelu ishinakunilu patama utatusseunuau tshe tapuetikau e utshimakanuatsh tipelitamun, tshe ish tshitapamakanitau Pekuakami-tshishe-utshimau tipelitamun mahk tshe ish tshimalakanitau nitshe tshe apitau nite Ka nanakatashiuetu miam tshe itashtelitsh aimuniss 56.
93. Pekuakamiulnuatsh utipelitamuau, utipahikanuau mahk utakuhimatsheu-atusseunuau ka tapuetatishutau eshk eka pitutepalitsh Tipelimitishun mashinaikan shaputuepalitakanu eshk ishinakuatsh tshetshi utinakanitsh tshika utinakanu miam tipelitamun.

Tapishkuatsh mamu mahapukutau